



SLUŽBENE NOVINE TUZLANSKOG KANTONA

GODINA 10 • TUZLA, PETAK, 31. OKTOBAR 2003. GODINE • IZDANJE NA BOSANSKOM JEZIKU • BROJ 11

229

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00 i 14/02) i člana 81. stav 2. Zakona o veterinarstvu ("Službene novine Federacije BiH", broj 46/00), na prijedlog Vlade Tuzlanskog kantona, Skupština Tuzlanskog kantona, na sjednici od 9. 10. 2003. godine, donosi

ZAKON

O OSNIVANJU JAVNE USTANOVE VETERINARSKI ZAVOD TUZLANSKOG KANTONA

I - OSNOVNE ODREDBE

Član 1.

Ovim zakonom osniva se Javna ustanova Veterinarski zavod Tuzlanskog kantona (u daljem tekstu: Veterinarski zavod).

II - PRAVNI POLOŽAJ I SJEDIŠTE

Član 2.

Veterinarski zavod posluje pod nazivom "Javna ustanova Veterinarski zavod Tuzlanskog kantona Tuzla".
Skrraćeni naziv ove ustanove je: JU VZTK Tuzla.

Član 3.

Sjedište Veterinarskog zavoda je u Tuzli.

Član 4.

Veterinarski zavod ima svojstvo pravnog lica i ima svoj račun.

Član 5.

Veterinarski zavod ima pečat kružnog oblika prečnika 50 mm sa sljedećim tekstom, ispisanim latinicom u koncentričnim krugovima: "Bosna i Hercegovina, Federacija Bosne i Hercegovine, Tuzlanski kanton, Javna ustanova Veterinarski zavod Tuzlanskog kantona Tuzla".

Pored pečata iz prethodnog stava, Veterinarski zavod ima za posebne potrebe pečat istog sadržaja i teksta, prečnika 25 mm.

Bliže odredbe o broju, vrsti, upotrebi i čuvanju pečata i štambilja utvrđuju se Pravilima Veterinarskog zavoda.

Član 6.

Veterinarski zavod se osniva za područje Tuzlanskog kantona (u daljem tekstu: Kanton).

Unutrašnja organizacija Veterinarskog zavoda uredit će se Pravilima Veterinarskog zavoda.

III - DJELATNOST

Član 7.

Djelatnost Veterinarskog zavoda je:

1. praćenje, analiziranje i proučavanje stanja u pogledu pojave, kretanja, suzbijanja i iskorjenjivanja zaraznih, parazitskih i drugih bolesti kod životinja i zoonoza;
2. obavljanje terenske i laboratorijske dijagnostike zaraznih, parazitskih i drugih bolesti kod životinja i zoonoza;
3. praćenje i analiziranje preventivnih i zaštitnih cijepljenja i dijagnostičkih ispitivanja životinja;
4. planiranje i organiziranje mjera dezinfekcije, dezinfekcije i deratizacije radi sprječavanja širenja, suzbijanja i iskorjenjivanja zaraznih bolesti kod životinja;
5. obavljanje laboratorijskih pretraga proizvoda životinjskog porijekla i vode, radi utvrđivanja zdravstvene ili higijenske ispravnosti i kvaliteta;
6. praćenje, analiziranje i ocjenjivanje utjecaja okoline na zdravstveno stanje životinja;
7. obavljanje laboratorijskih pretraga rezidua i drugih biološki aktivnih materija u životinjama, proizvodima životinjskog porijekla, hrani za životinje i vodi;
8. obavljanje ispitivanja radioaktivnih materija na i u životinjama, u proizvodima životinjskog porijekla i u hrani za životinje i u vodi;
9. obavljanje toksikoloških ispitivanja životinja, proizvoda životinjskog porijekla i hrane za životinje;
10. pružanje stručne pomoći veterinarskim organizacijama i proizvođačima proizvoda životinjskog porijekla i hrane za životinje;
11. obavljanje i drugih poslova u skladu sa Zakonom o veterinarstvu ("Službene novine Federacije Bosne i Hercegovine", broj 46/00, u daljem tekstu: Zakon o veterinarstvu).

Član 8.

U okviru registrovane djelatnosti, Veterinarski zavod ima sva prava i obaveze u pravnom prometu koja pripadaju pravnom licu s neograničenom odgovornošću.

Član 9.

Veterinarski zavod, u ostvarivanju svoje djelatnosti, saraduje sa organima Bosne i Hercegovine, Federacije Bosne i Hercegovine, Kantona, pravnim i fizičkim licima s područja cijele Bosne i Hercegovine, te iz inozemstva.

Član 10.

Rad Veterinarskog zavoda je javan.

Javnost rada obezbjeđuje se na način i pod uslovima utvrđenim Pravilima Veterinarskog zavoda.

IV - IMOVINA I SREDSTVA

Član 11.

Osnivački kapital iznosi 2.000,00 KM.

Sredstva za rad Veterinarskog zavoda obezbjeđuju se iz budžeta osnivača, naknada za obavljene usluge iz djelatnosti za koju je osnovan, prihoda od pokretne ili nepokretne imovine koju Veterinarski zavod kupi ili stekne u skladu sa zakonom, imovine iz člana 27. ovog zakona i drugih izvora.

Veterinarski zavod može stjecati sredstva za rad i učešćem u zajedničkom prihodu, kojeg ostvari udruživanjem sredstava ili ulaganjem.

Član 12.

Višak prihoda nad rashodima Veterinarski zavod koristi za obnavljanje, unaprijeđivanje i razvoj djelatnosti koju obavlja, uz saglasnost osnivača.

Član 13.

Višak rashoda nad prihodima Veterinarski zavod pokriva do visine sredstava kojima raspolaže.

Član 14.

Veterinarski zavod u prometu istupa samostalno, a u okviru svojih ovlaštenja utvrđenih zakonom.

Za svoje obaveze Veterinarski zavod odgovara svom svojom imovinom - potpuna odgovornost.

Osnivač supsidijarno odgovara za obaveze Veterinarskog zavoda.

V - UPRAVLJANJE

Član 15.

Veterinarskim zavodom upravlja Upravni odbor, koji se sastoji od tri člana, od kojih je jedan predsjednik.

Upravni odbor čine:

- predstavnik osnivača - jedan član;
- predstavnik veterinarskih zaposlenika iz veterinarske organizacije - jedan član;
- predstavnik Veterinarskog zavoda - jedan član.

U ime osnivača, predsjednika i članove Upravnog odbora imenuje i razrješava Vlada Kantona na period od 4 godine, s tim da, po isteku ovog perioda, mogu biti ponovno imenovani.

Upravni odbor je za svoj rad odgovoran Vladi Kantona.

Način imenovanja, opoziva i mandata članova Upravnog odbora uređuje se Pravilima Veterinarskog zavoda.

Član 16.

Upravni odbor Veterinarskog zavoda nadležan je da:

- donosi Pravila Veterinarskog zavoda, uz saglasnost Vlade Kantona;
- donosi opći akt o unutrašnjoj organizaciji i sistematizaciji radnih mjesta u Veterinarskom zavodu, uz saglasnost Vlade Kantona;
- donosi cjenovnik o visini naknada za izvršene usluge, uz saglasnost Vlade Kantona;
- donosi druge opće akte;
- donosi godišnji program rada Veterinarskog zavoda i nadzire njegovo izvršenje;
- imenuje i razrješava direktora Veterinarskog zavoda, uz saglasnost Vlade Kantona;
- usmjerava, kontroliše i ocjenjuje rad direktora;
- utvrđuje plan rada;
- donosi finansijski plan i završni račun, te usvaja izvještaj o finansijskom poslovanju, uz saglasnost Skupštine Kantona;
- rješava pitanja odnosa sa osnivačem;
- odgovara osnivaču za rezultate rada Veterinarskog zavoda;
- podnosi osnivaču, najmanje jedanput godišnje, izvještaj o finansijskom poslovanju;
- odlučuje o promjeni unutrašnje organizacije, uz saglasnost Vlade Kantona;
- predlaže osnivaču promjenu djelatnosti ili njeno proširenje u djelokrugu veterinarstva;
- daje osnivaču i direktoru prijedloge i mišljenja o pojedinim pitanjima;
- obavlja i druge poslove, u skladu sa zakonom i općim aktima Veterinarskog zavoda.

VI - RUKOVOĐENJE

Član 17.

Veterinarskim zavodom rukovodi direktor.

Direktora Veterinarskog zavoda imenuje i razrješava Upravni odbor uz saglasnost Vlade Kantona, na osnovu javnog konkursa koji se objavljuje u javnim glasilima.

Direktor se imenuje na period od četiri godine i po isteku tog perioda isto lice može biti ponovno imenovano.

Član 18.

Za direktora Veterinarskog zavoda može se postaviti doktor veterinarske medicine koji ima položen stručni ispit i najmanje pet godina radnog staža u struci.

Član 19.

Ako direktor Veterinarskog zavoda nije imenovan u skladu sa zakonom u roku od 60 dana od dana isteka konkursa, odluku o postavljenju vršioca dužnosti direktora donosi Upravni odbor, uz saglasnost Vlade Kantona.

Vršilac dužnosti direktora postavlja se najduže na period od šest mjeseci, i u tom periodu ima sva prava i obaveze direktora Veterinarskog zavoda.

Član 20.

Upravni odbor može razrješiti direktora i prije isteka mandata za koji je imenovan ako:

1. direktor to lično zahtijeva;
2. nastane neki od razloga koji prema posebnim propisima ili propisima kojima se uređuje radni odnos dovede do prestanka radnog odnosa;

3. u svom radu krši propise i opće akte Veterinarskog zavoda, ili ne izvršava odluke Upravnog odbora ili postupka čak suprotno njima;

4. nastanu druge okolnosti propisane zakonom i Pravilima Veterinarskog zavoda.

Član 21.

Direktor Veterinarskog zavoda nadležan je da:

- organizuje poslovanje i rukovodi radom Veterinarskog zavoda;
- zastupa i predstavlja Veterinarski zavod prema trećim licima;
- stara se o blagovremenom obezbjeđivanju finansijskih sredstava potrebnih za zadovoljavanje potreba iz domena djelatnosti koju Veterinarski zavod obavlja;
- stara se o sprovođenju dogovora, sporazuma i ugovora koje Veterinarski zavod zaključio ili im pristupi;
- predlaže Upravnom odboru mjere za efikasno i zakonito obavljanje djelatnosti, unutrašnju organizaciju i sistematizaciju poslova, i osnove plana rada i razvoja;
- izvršava odluke Upravnog odbora;
- podnosi Upravnom odboru godišnji plan rada i izvještaj o finansijskom poslovanju;
- odlučuje o pravima, obavezama i odgovornostima iz radnog odnosa zaposlenika Veterinarskog zavoda;
- obavlja i druge poslove utvrđene zakonom i općim aktima Veterinarskog zavoda.

Direktor je naredbodavac za izvršenje finansijskog plana.

Direktor je odgovoran Upravnom odboru Veterinarskog zavoda za rezultate rada i finansijsko poslovanje Veterinarskog zavoda.

Član 22.

Bliže odredbe o imenovanju, vršenju funkcije i razrješenju direktora bit će donesene u Pravilima Veterinarskog zavoda.

VII - NADZORNI ODBOR

Član 23.

Organ kontrole poslovanja u Veterinarskom zavodu je Nadzorni odbor.

Nadzorni odbor ima tri člana, od kojih je jedan predsjednik.

Predsjednika i članove Nadzornog odbora imenuje i razrješava Vlada Kantona.

Najmanje jedan član Nadzornog odbora mora biti iz reda zaposlenika Veterinarskog zavoda.

Predsjednik i članovi Nadzornog odbora imenuju se na period od četiri godine, s tim da mogu biti ponovno birani po isteku mandata.

Član 24.

Nadzorni odbor nadležan je da:

- analizira izvještaje o poslovanju Veterinarskog zavoda;
- obavlja nadzor nad upotrebom sredstava za rad;
- pregleda godišnji izvještaj o poslovanju i godišnji obračun;
- pregleda i provjerava urednost i zakonitost vođenja poslovnih knjiga;
- izvještava osnivača, Upravni odbor i direktora o rezultatima nadzora.

VIII - NADZOR

Član 25.

Nadzor nad zakonitošću i pravilnošću rada Veterinarskog zavoda vrši Ministarstvo poljoprivrede, šumarstva i vodoprivrede (u daljem tekstu: Ministarstvo).

IX - AKTI

Član 26.

Osnovni opći akt Veterinarskog zavoda su Pravila Veterinarskog zavoda.

Veterinarski zavod može imati i druge opće akte u skladu sa zakonom i Pravilima Veterinarskog zavoda.

Pravila Veterinarskog zavoda, akt o unutrašnjoj organizaciji i sistematizaciji radnih mjesta, te cjenovnik o visini naknada za izvršene usluge, podliježu obaveznoj saglasnosti Vlade Kantona.

Pravila Veterinarskog zavoda sadrže odredbe o:

- nazivu i sjedištu;
- osnivaču i obavezama prema osnivaču;
- pečatu i štambilju;
- zastupanju i predstavljanju;
- djelatnosti Veterinarskog zavoda;
- organizaciji Veterinarskog zavoda;
- općim aktima i načinu njihova donošenja;
- odnosu prema korisnicima usluga;
- načinu raspoređivanja sredstava za rad;
- imenovanju i razrješenju direktora;
- drugim organima, njihovim pravima, obavezama i odgovornostima, uslovima i načinu njihova izbora i razrješenja;
- licima ovlaštenim da, pored direktora, zastupaju Veterinarski zavod, i njihovim ovlaštenjima i odgovornostima;
- načinu ostvarivanja javnosti rada;
- rješavanju o pravima na osnovu zakona;
- finansiranju i finansijskom poslovanju;
- drugim pitanjima od značaja za rad Veterinarskog zavoda i za ostvarivanje prava i obaveza zaposlenih u Veterinarskom zavodu, u skladu sa zakonom i drugim propisima.

X - PRIJELAZNE I ZAVRŠNE ODREDBE

Član 27.

Veterinarski zavod, nakon stupanja na snagu ovog zakona, preuzima zaposlenike, opremu, inventar i druge stvari, arhivu, akte, predmete, drugu dokumentaciju i sredstva za rad, poslovni prostor i drugu imovinu potrebnu za ostvarivanje djelatnosti, iz dosadašnjeg Veterinarskog zavoda koji se nalazio u sastavu Ministarstva, kao upravna organizacija.

Član 28.

Vlada Kantona će u roku od 60 dana počev od dana stupanja na snagu ovog zakona, imenovati Upravni odbor Veterinarskog zavoda.

Član 29.

Upravni odbor će, uz saglasnost Vlade Kantona, imenovati vršioca dužnosti direktora Veterinarskog zavoda na period od 60 dana, u roku od 30 dana od dana imenovanja Upravnog odbora.

Upravni odbor je dužan, do isteka mandata vršioca dužnosti direktora Veterinarskog zavoda, provesti postupak javnog oglašavanja i izabrati i imenovati direktora Veterinarskog zavoda.

Član 30.

Upravni odbor Veterinarskog zavoda donijet će Pravila Veterinarskog zavoda i akt o unutrašnjoj organizaciji i sistematizaciji

radnih mjesta u roku od 60 dana od imenovanja Upravnog odbora, te poduzeti druge radnje neophodne za početak rada Veterinarskog zavoda.

Član 31.

Ovaj zakon predstavlja osnivački akt na osnovu kojeg će se izvršiti upis Veterinarskog zavoda u sudski registar.

Član 32.

Veterinarski zavod ne može početi s radom dok ministar poljoprivrede, šumarstva i vodoprivrede ne donese rješenje o ispunjavanju uslova propisanih odredbama Zakona o veterinarstvu i podzakonskih akata iz oblasti veterinarstva u pogledu prostora, kadrova i veterinarsko-tehničke opreme.

Član 33.

Ovaj zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina
 Federacija Bosne i Hercegovine
 TUZLANSKI KANTON
 Skupština
 Broj: 01-02-394-13/03
 Tuzla, 9. 10. 2003. godine

Predsjednik
 Skupštine Tuzlanskog kantona,
Amir Fazlić, v.r.

230

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97, 3/99 i "Službene novine Tuzlanskog kantona", br. 13/99, 10/00 i 14/02), na prijedlog Vlade Tuzlanskog kantona, Skupština Tuzlanskog kantona, na sjednici od 9. 10. 2003. godine, donosi

ZAKON

O IZMJENAMA I DOPUNAMA ZAKONA O UNIVERZITETU U TUZLI

Član 1.

U Zakonu o Univerzitetu u Tuzli ("Službene novine Tuzlanskog kantona", br. 13/99, 12/00, 2/02 i 10/02) u članu 5., iza stava 8., dodaju se novi stavovi: 9., 10., 11., 12. i 13. koji glase:

"Na Akademiji dramskih umjetnosti u Tuzli organizuje se novi studijski odsjek Produkcija.

Na Defektološkom fakultetu u Tuzli organizuje se novi studijski odsjek Poremećaji u ponašanju.

Na Filozofskom fakultetu u Tuzli organizuje se novi studijski odsjek Socijalni rad.

Pri Medicinskom fakultetu u Tuzli organizuje se novi studijski odsjek Visoka zdravstvena škola.

Na Fakultetu elektrotehnike u Tuzli organizuje se novi studijski odsjek Komunikacije."

Član 2.

U članu 20. stav 1. alineja 12., i u daljem tekstu Zakona, riječ: "radnika" zamjenjuje se riječju: "zaposlenika" u odgovarajućem padežu i obliku.

Član 3.

Ovaj zakon stupa na snagu narednog dana od dana objavljivanja u "Službenim novinama Tuzlanskog kantona".

Bosna i Hercegovina
 Federacija Bosne i Hercegovine
 TUZLANSKI KANTON
 Skupština
 Broj: 01-02-547-4/03
 Tuzla, 9. 10. 2003. godine

Predsjednik
 Skupštine Tuzlanskog kantona,
Amir Fazlić, v.r.

231

Na osnovu člana 24. stav 1. tačka b) Ustava Tuzlanskog kantona ("Službene novine Tuzlansko-podrinjskog kantona", br. 9/97 i 3/99 i "Službene novine Tuzlanskog kantona", br. 13/99, 10/00 i 14/02), člana 24. stav 4. Zakona o trezoru u Federaciji Bosne i Hercegovine ("Službene novine Federacije Bosne i Hercegovine", broj 19/03), Skupština Tuzlanskog kantona, na sjednici od 9. 10. 2003. godine, donosi

IZMJENE

BUDŽETA TUZLANSKOG KANTONA ZA 2003. GODINU

Član 1.

U Budžetu Tuzlanskog kantona za 2003. godinu ("Službene novine Tuzlanskog kantona", br. 3/03 i 7/03), u članu 5., iza riječi "1.1.2003. godine" stavlja se tačka i briše tekst: "izuzev izmjena i dopuna koje se odnose na prihode koje budžetski korisnici ostvaruju pružanjem javnih usluga i njihov raspored po namjenama koje se primjenjuju od 1.7.2003. godine".

Član 2.

Ove izmjene Budžeta Tuzlanskog kantona za 2003. godinu stupaju na snagu danom objavljivanja u "Službenim novinama Tuzlanskog kantona", a primjenjuju se od 1.1.2003. godine.

Bosna i Hercegovina
 Federacija Bosne i Hercegovine
 TUZLANSKI KANTON
 Skupština
 Broj: 01-02-545-5/03
 Tuzla, 9. 10. 2003. godine

Predsjednik
 Skupštine Tuzlanskog kantona,
Amir Fazlić, v.r.

232

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00 i 14/02), a u vezi sa članom 24. stav 5. Zakona o proračunima - budžetima u Federaciji Bosne i Hercegovine ("Službene novine Federacije Bosne i Hercegovine", broj 20/98) na prijedlog Vlade Tuzlanskog kantona, Skupština Tuzlanskog kantona, na sjednici održanoj 9. 10. 2003. godine, donosi

ODLUKU

O DAVANJU SAGLASNOSTI NA IZMJENE I DOPUNE FINANSIJSKOG PLANA JU SLUŽBE ZA ZAPOSŁJAVANJE TUZLANSKOG KANTONA ZA 2003. GODINU